

四庫全書

史部

欽定四庫全書

史部

山東通志卷三十五之八

詳校官監察御史臣劉涓

檢討臣德生覆勘

總校官知縣臣繆琪

校對官助教臣卜維吉

謄錄監生臣許蔭培

欽定四庫全書

山東通志卷三十五之七

藝文志七贊

管仲晏嬰傳贊

史記

漢司馬遷

太史公曰吾讀管氏牧民山高乘馬輕重九府及晏子春秋詳哉其言之也既見其著書欲觀其行事故次其傳至其書世多有之是以不論論其軼事管仲世所謂賢臣然孔子小之豈以為周道衰微桓公既

賢而不勉之至王乃稱霸哉語曰將順其美匡救其惡故上下能相親也豈管仲之謂乎方晏子伏莊公尸哭之成禮然後去豈所謂見義不為無勇者邪至其諫說犯君之顏此所謂進思盡忠退思補過者哉假令晏子而在余雖為之執鞭所忻慕焉

孟子傳贊

史記

漢司馬遷

太史公曰余讀孟子書至梁惠王問何以利吾國未嘗不廢書而歎也曰嗟乎利誠亂之始也夫子罕言

利者當防其原也故曰放於利而行多怨自天子至  
於庶人好利之弊何以異哉

田單傳贊

史記

漢司馬遷

太史公曰兵以正合以奇勝善之者出奇無窮奇正  
還相生如環之無端夫始如處女適人開戶後如脫  
兔適不及距其田單之謂邪

劉敬叔孫通傳贊

史記

漢司馬遷

太史公曰語曰千金之裘非一狐之腋也臺榭之榱

非一木之枝也三代之際非一士之智也信哉高祖起微細定海內謀計用兵可謂盡之矣然而劉敬脫輓輅一說建萬世之安智豈可專邪叔孫通希世度務制禮進退與時變化卒為漢家儒宗大直若誣道固委蛇蓋謂是乎

公孫弘傳贊

史記

漢司馬遷

太史公曰公孫弘行義雖修然亦遇時漢興八十餘年矣上方鄉文學招俊乂以廣儒墨弘為舉首主父

偃當路諸公皆譽之及名敗身誅士爭言其惡悲夫  
太皇太后詔大司徒大司空蓋聞治國之道富民為  
始富民之要在於節儉孝經曰安上治民莫善於禮  
禮與奢也寧儉昔者管仲相齊桓霸諸侯有九合一  
匡之功而仲尼謂之不知禮以其奢泰侈擬於君故  
也夏禹卑宮室惡衣服後聖不循由此言之始之盛  
也德優矣莫高於儉儉化俗民則尊卑之序得而骨  
肉之恩親爭訟之原息斯乃家給人足刑措之本也

歟可不務哉夫三公者百寮之率萬民之表也未有  
樹直表而得曲影者也孔子不云乎子率以正孰敢  
不正舉善而教不能則勸維漢興以來股肱宰臣身  
行儉約輕財重義較然著明未有若效丞相平津侯  
公孫弘者也位在丞相而為布被脫粟之飯不過一  
肉故人所善賓客皆分奉祿以給之無有所餘誠內  
自克約而外從制汲黯詰之乃聞於朝此可謂減於  
制度而可施行者也德優則行否則止與內侈泰而



外為詭服以釣虛譽者殊科以病乞骸骨孝武皇帝  
即制曰賞有功褒有德善善惡惡君宜知之其省思  
慮存精神輔以醫藥賜告治病牛酒羅帛居數月有  
瘳視事至元狩二年竟以善終至相位夫知臣莫若  
君此其效也弘子度嗣爵後為山陽太守坐法失侯  
夫表德章義所以率俗厲化聖王之制不易之道也  
其賜引後子孫之次當為後者爵關內侯食邑三百  
戶徵詣公車上名尚書朕親臨拜焉

董仲舒傳贊

前漢書

漢班固

贊曰劉向稱董仲舒有王佐之才雖伊呂亡以加管  
晏之屬伯者之佐殆不及也至向子歆以為伊呂乃  
聖人之偶王者不得則不興故顏淵死孔子曰噫天  
喪予惟此一人為能當之自宰我子貢子游子夏不  
與焉仲舒遭漢承秦滅學之後六經離析下帷發憤  
潛心大業令後學者有所統一為羣儒首然考其師  
友淵源所漸猶未及乎游夏而曰管晏弗及伊呂不

加過矣至向曾孫龔篤論君子也以歆之言為然

章賢傳贊

前漢書

漢班固

司徒掾班彪曰漢承亡秦絕學之後祖宗之制因時  
施宜自元成後學者蕃滋貢禹毀宗廟匡衡改郊兆  
何武定三公後皆數復故紛紛不定何者禮文缺微  
古今異制各為一家未易可偏定也考觀諸儒之議  
劉歆博而篤矣

蕭望之傳贊

前漢書

漢班固

贊曰蕭望之歷位將相籍師傅之恩可謂親昵亡間  
及至謀泄隙開讒邪構之卒為便嬖宦豎所圖哀哉  
不然望之堂堂折而不撓身為儒宗輔佐之能近古  
社稷臣也

鄭康成傳贊

後漢書

宋 范蔚宗

論曰自秦焚六經聖文埃滅漢興諸儒頗修藝文及  
東京學者亦各名家而守文之徒滯固所稟異端紛  
紜互相詭激遂令經有數家家有數說章句多者或

乃百餘萬言學徒勞而少功後生疑而莫正康成括囊大典網羅衆家刪裁繁蕪刊改漏失自是學者略知所歸王父豫章君每考先儒經訓而長於康成常以為仲尼之門不能過也及傳授生徒竝顛以鄭氏家法云

東平王東海王傳贊

後漢書

宋范蔚宗

論曰孔子稱貧而無諂富而無驕未若貧而樂富而好禮者也若東平憲王可謂好禮者也若其辭至戚

去母后豈欲苟立名行而忘親遺義哉蓋位疑則隙  
生累近則喪大斯蓋明哲之所為歎息嗚呼遠隙以  
全忠釋累以成孝夫豈憲王之志哉東海恭王遜而  
知廢為吳太伯不亦可乎

孔融傳贊

後漢書

宋 范蔚宗

論曰昔諫大夫鄭昌有言山有猛獸者黎藿為之不  
採是以孔父正色不容弑虐之謀平仲立朝有紓盜  
齊之望若夫文舉之高志直情其足以動義概而忤

雄心故使移鼎之迹事隔於人存代終之規啟機於  
身後也夫嚴氣正性覆折而已豈有員園委曲可以  
巧其生哉懍懍焉皜皜焉其與琨玉秋霜比質可也

諸葛亮傳贊

後漢書

晉陳壽

評曰諸葛亮之為相國也撫百姓示儀軌約官職從  
權制開誠心布公道盡忠益時者雖仇必賞懼法怠  
慢者雖親必罰服罪輸情者雖重必釋游詞巧飾者  
雖輕必戮善無微而不賞惡無纖而不貶庶事精鍊

物理其本循名責實虛偽不齒終於邦域之內咸畏而愛之刑政雖峻而無怨者以其用心平而勸戒明也可謂識治之良才管蕭之亞匹矣然連年動衆未能成功蓋應變將略非其所長歟

羊祜傳贊

晉書

唐史臣

史臣曰泰始之際神祇呈貺羊公起平吳之策其見天地之心焉昔齊有黔夫燕人祭北門之鬼趙有李牧秦王罷東并之勢桑枝不競瓜潤空慙垂大信於



南服傾吳人於漢渚江衢如砥襁袂同歸而在乎成  
功弗居幅巾窮巷落落焉其有風颺者也

王導傳贊

晉書

唐史臣

史臣曰原夫典午發蹤本於陵寡金行撫運無德在  
時九土未宅其心四夷已承其弊既而中原蕩覆江  
左嗣興兆著元石之圖乖少康之祀夏時無思晉之  
士異文叔之興劉輔佐中宗艱哉甚矣茂弘策名枝  
屏叶情交好負其才智恃彼江湖思建克復之功用

成盟宣之道於是王敦內侮憑天邑而狼顧蘇峻連  
兵指宸居而隼擊實賴元宰固懷匪石之心潛運忠  
謨竟剪吞沙之寇丹誠貫日主垂餌以終全貞志陵  
霜國綴旒而不滅觀其開設學校存乎沸鼎之中爰  
立章程在乎櫛風之際雖則世道多故而規模弘遠  
提挈三世終始一心稱為仲父蓋其宜矣

王羲之傳贊

晉書

唐太宗御製

制曰書契之興肇乎中古繩文鳥跡不足可觀末代

去朴歸華舒牋點翰爭相誇尚競其工拙伯英臨池  
之妙無復餘蹤師宜懸帳之奇罕有遺跡逮乎鍾王  
以降略可言焉鍾雖擅美一時亦為迥絕論其盡善  
或有所疑王於布織濃分疎密霞舒雲卷無所間然  
但其體則古而不今字則長而逾制語其大量以此  
為瑕獻之雖有父風殊非新巧觀其字勢踈瘦如隆  
冬之枯樹覽其筆蹤拘束若嚴家之餓隸其枯樹也  
雖槎枿而無屈伸其餓隸也則羈羸而不放縱兼斯

二者故翰墨之病歟子雲近出擅名江表然僅得成書無丈夫之氣行行若縈春蚓字字如縮秋蛇臥王蒙於紙中坐徐偃於筆下雖禿千兔之翰聚無一毫之筋窮萬穀之皮斂無半分之骨以茲播美非其濫名邪此數子者皆譽過其實所以詳察古今研精篆素盡善盡美其惟王逸少乎觀其點曳之工裁成之妙烟霏露結狀若斷而還連鳳翥龍蟠勢如斜而反正翫之不覺為倦覽之莫識其端心慕手追此人而

已其餘區區之類何足論哉

徐陵傳贊

陳書

唐姚思廉

史臣曰徐孝穆挺五行之秀稟天地之靈聰明特達  
籠罩今古及締構興王遭逢泰運位隆朝宰獻替謀  
猷蓋亮直存矣孝克砥身厲行養親逾禮亦參閔之  
志歟

馬周傳贊

唐史

宋歐陽修

贊曰周之遇太宗顧不異哉由一介草茅言天下事

若素宦於朝明習憲章者非王佐才疇以及茲其自  
視與築巖釣渭亦何以異迹夫帝銳於立事而周所  
建皆切一時以明佐聖故君宰間不膠漆而固恨相  
得晚宜矣然周才不逮傳說呂望使後世未有述焉  
惜乎

崔羣傳贊

唐史

宋  
歐陽修

贊曰聖人不畏多難畏無難何哉多難之世人長  
慮而深謀日惕於中猶以為未也曰吾覆亡不暇又

何以安故能舉天下付之興畏之也禍難已平上恬  
下嬉施施自如曰賢難得雖無賢尚可治也佞可去  
雖存佞不遽亂也視漏弗填忽傾弗支偃然自慰曰  
我曷以喪故能舉天下付之亡不畏也常人所畏聖  
人易之所不畏聖人難之觀孝明皇帝本中主遭變  
可與謀始持成不可與共終崔羣以為相李林甫則  
治亂已分其言信哉是扁鵲所以誚桓侯也

孔道輔等傳贊

宋史與鞠詠劉隨曹修  
古郭勸段少連同贊

元  
脫  
脫

論曰古人有言山有猛獸藜藿為之不採當天聖明  
道間天子富於春秋母后稱制而內外肅然紀綱具  
舉朝政無大闕失奸人不得以自肆者由言路得人  
故也是時孔道輔鞠詠劉隨曹修古迭為諫官御史  
郭勸段少連繼之皆侃侃正色遇事輒言雖被斥逐  
不更其守及帝既親政道輔勸少連復任言責郭后  
之廢引議慷慨犯人主責大臣其氣益壯遺風餘烈



天下至今稱之詩所謂邦之司直其庶幾歟

范仲淹純仁傳贊

宋史

元脫脫

論曰仲淹初在制中遺宰相書極論天下事他日為政盡行其言諸葛孔明草廬始見昭烈數語生平事業備見於是豪傑自知之審類如是乎攷其當朝雖不能久然先憂後樂之志海內固已信其有弘毅之器足任斯責使究其所欲為豈讓古人哉純仁位過其父而幾有父風元祐建議攻熙豐太急純仁揀蔡

確一事所謂謀國甚遠當世若從其言元祐黨錮之禍不至若是烈也仲淹謂諸子純仁得其忠純禮得其靜純粹得其略知子莫若父哉

張暉張行簡傳贊

金史

元脫脫

贊曰張暉行簡世為禮官世習禮學其為禮也行於家庭講於朝廷施用於隣國無不中度古者官有世掌學有專門金諸儒臣惟張氏父子庶幾無愧於古乎

尼父贊

漢  
張超

巖巖孔聖異世稱傑量合乾坤明參日月德被八荒  
名克遐外終於獲麟遺歌魯衛

顓頊贊

魏  
曹植

昌意之子祖有軒轅始誅九黎水德統天以國為號  
風化神宣威暢八極靡不祇虔

帝堯贊

魏  
曹植

大德統位父則高辛克平共工萬國同塵調適陰陽

其惠如春巍巍成功配天則神

帝舜贊

魏曹植

顓頊之族重瞳神聖克協頑瞽應唐涖政除凶舉俊  
以齊七政膺歷受禪顯天之命

正考父贊

魏王粲

恂恂正父應德孔盛身為國卿族則公姓年在耆耄  
三葉聞政誰能不迨申茲約敬饘粥子口偃僂受命  
名書金鼎祚及後聖

孔子贊

晉陸機

孔子睿聖配天弘道風扇元流思探神寶明發懷周  
興言謨老靈魄有行言觀蒼昊青歌先成丹書有造

尼父贊

晉孫楚

皇矣尼父聖哲之傑德比天地明齊日月周室凌遲  
大道蕪穢禮樂崩阻姦雄固世乃養門徒廣延俊乂  
垂訓列國頌聲魯衛威振夾谷義壓陳蔡德之休明  
幽而彌泰超美三代風馳雲邁

孔子贊

晉 湛方生

文王既歿微言將墜邈哉孔子龍見九二闡化繫象  
素王洙泗發揮中葉道映周季

顏子贊

晉 夏侯湛

知彰知微體深研幾明象介石量同聖師探賸罔滯  
在言靡遺仰諸惟高瞻之攸希

閔子贊

晉 夏侯湛

聖既擬天賢亦希聖蒸蒸子騫立體忠正于祿辭多

事親盡敬勉心景迹擢辭流詠

左丘明贊

晉  
夏侯湛

世亂讒勝君子道憂丘明達聖致志春秋微言逃難  
旁行不流庶幾斯文希志訓猷

管仲贊

晉  
夏侯湛

堂堂管生志存興仁仁道在已唯患無身包辱遠害  
思濟彝倫心寄鮑子動成生民

鮑叔贊

晉  
夏侯湛

鮑子愔愔式昭德音交繆敬叔二人同心厥芳猶蘭  
其堅如金遙遙景迹君子攸歛

魯仲連贊

晉夏侯湛

我我先生有邈其節成仁憂亂抗道自潔隨事抑揚  
與時開闔在幽能泰處悶惟悅

魯敬姜贊

晉左芬

邈矣敬姜含德之英於行則高於理斯明垂訓子宗  
厲發竒聲宣尼三歎萬代遺馨



接輿妻贊

晉左芬

接輿高潔懷道行謠妻亦冰清同味元昭遺俗榮津  
志遠神遼

孟母贊

晉左芬

鄒母善導三徙成教鄰止庠序俎豆是效斷機激子  
廣以墳奧聰達知禮敷述聖道

齊杞梁妻贊

晉左芬

遭運不改逢時險屯夫卒莒場郊弔不賓哀崩高城

訴情穹昊遂赴淄川託軀清津

齊義繼母贊

晉左芬

聖教元化禮貴信誠至哉繼母行合典經不遺宿諾  
義割私情表德來裔垂則後生

班婕妤贊

晉左芬

恂恂班女恭讓謙虛辭輦進賢辯祝理誣形圖丹青  
名侔樊虞

任太常贊

晉孫綽

海岱協靈育此多士峩峩君侯東國之紀金德發耀  
英風邵起文齊游夏行儔魯史有邈其聲令聞不已  
人亦有言德崇譽高束帛既延旌節仍招儀型朝堂  
流風丹青將振華袞永渙皇朝上帝靡盬曾不遐齡  
衛霍頽鎮哲人其傾邦國殄瘁縉紳喪情仰企高範  
永播休聲

夷齊贊

晉  
陶潛

二子讓國相隨海隅天人革命絕景窮居採薇高歌

慨想唐虞貞風凌俗爰感懦夫

周公戒伯禽

南北朝

庾信

伯禽居魯鳴玉來朝周公政治為國風謠北山有梓  
南山有喬禮容雖備俯仰無驕

師尚父授丹書

庾信

尚父一遇周王是親赤雀既下丹書已陳自論秉鉞  
長別垂綸獨有磻石留名渭濱

夫子見程生

有傾蓋亭

庾信

程生夫子一遇相知薄言傾蓋桑陰遂移清揚共美  
賢聖同羈陳詩難別贈絹傷離

榮啟期三樂

在古成邑

庾信

榮期三樂惟人與年夫子相遇即以為賢性靈造化  
風雲自然雅琴雖古獨有鳴弦

延陵季子遇徐君

有掛劍臺

庾信

徐君有禮季子惟賢經過一遇如舊識然人非別後  
心許生前長松雖合寶劍猶懸

張良遇黃石公

黃石在穀城縣

庾信

張良取履跣授無辭兵書一卷長者三期昔稱韓相  
今為帝師穀城黃石還歸舊祠

朱雲折檻

雲魯人

庾信

上書直諫有忤明君先求斬馬遂請龜文身摧欄檻  
義烈風雲應從御史翻賴將軍

王祥叩冰魚躍

祥臨沂人

庾信

王祥之母祥鱗是求冰連釣浦凍塞寒流精誠有感

無假沉鈞二老同膳雙魚共浮

曾子贊

唐蘇頌

百行之極三才以教聖人叙經曾氏知孝全謂手足  
動稱容貌事親事君是則是效

管敬仲贊

唐蘇頌

小白圖霸尊周服楚聿求仁智扶我此舉叔牙知人  
拔管於魯一言而合爰制師旅布命諸侯威行九土  
周王南面列國來朝朝服濟河心無動搖復讐匡世

成乎一朝邢歸衛存楚貢包茅懸軍北討山戎遁逃  
三歸備職不足累德七子仕楚後人霑臆

管幼安贊

唐蘇頌題

我蠶我衣我耕我食推心而動神佐正直溟波不沉  
仗此之力島夷卉服移我淳德衡門棲遲臺佐讓職  
時非吾世語不如默

二疏贊

唐權德輿

靜專動植惟乾之德酌用不窮君子中庸矯矯二疏



知微知終功成不居父子清風天子賜金羣公出祖  
都門之美焯映千古優游衡門棲息化源日飲醇酎  
心閑道尊人或言利利令智昏清行素風可貽子孫  
萬物營營吉凶相生環中之樞泊然遺行中林寂寥  
幽蘭自榮雖有繒繳不羈冥冥知止不殆古先炯戒  
賢哉大夫終始無悔

劉渝公政會贊

唐呂溫

河出崑崙來潤中夏連山合沓橫擁其派巨霧勃然

手擘太華決流東注功竝造化粵我聖唐將舉晉陽  
帝命是將往拯溺於四方亦既載旆亦既秉鉞強克  
當路拒不得發渝公慷慨感義激節用奇制變大事  
立決雷奮雷越天衢八達則莫我敢遏如巨霧破山  
河勢始豁赫矣渝公與神齊烈跡如仙掌炯炯不滅  
強克謂王威高君雅

李英公勳贊

唐  
呂温

橫流莫極大亂無象英公傑出應運為將與楚楚霸

與漢漢王天時人事隨我所向長蛇縱蠹東據河洛  
婪婪封豕來濟同惡號吼連聲如雷如霆萬里震驚  
時維英公諒我大宗斬豕以越取蛇於穴乃定九鼎  
乃開明堂奄有大邦金甲同光告成於王皇業用昌  
帝命英公北伐獫狁雷鼓殷殷旄頭幾殞掃雲黑山  
布庚陽春五原草綠不見南牧島夷來庭天子親征  
其鋒惟英莫拒莫抗是震是蕩破東海浪天下既和  
解鞍投戈袞服委蛇華髮皤皤終始三朝無玷可磨

二疏圖贊

宋蘇軾

惟天為健而不干時沈潛剛克以變和之於赫漢高  
以智力王凜然君臣師友道喪孝宣中興以法馭人  
殺盡韓楊蓋三良臣先生憐之振袂脫屣使知區區  
不足驕士此意莫陳千載於今我觀畫圖涕下沾襟

孔北海贊

併序

宋蘇軾

文舉以英偉冠世之資師表海內意所予奪天下從  
之此人中龍也而曹操陰賊險狠特鬼蜮之雄者耳

其勢決不兩立非公誅曹則曹害公此理之常而前  
史乃謂公負其高氣志在靖難而才疎意廣訖無成  
功此蓋當時奴婢小人論公之語公之無成天也使  
天未欲亡漢公誅曹若殺狐兔何足道哉世之稱人  
豪者才氣各有高卑然皆以臨難不懼談笑就死為  
雄操以病亡子孫滿前而咿嚶涕泣留連妾婦分香  
賣履區處衣物平生奸偽死見真性世以成敗論人  
物故操得在英雄之列而公見謂才疎意廣豈不悲

哉操平生畏劉備而備以公知天下有已為喜天若  
祚漢公使備備誅曹無難也予讀公所作楊四公贊  
歎曰方操害公復有魯國一男子慨然爭之公庶幾  
不死乃作孔北海贊曰晉有羯奴盜賊之靡欺孤如  
操又何所恥我書春秋與齊豹齒文舉在天雖亡不  
死我宗若人尚友千祀視公如龍視操如鬼

王元之贊

并序

宋

蘓軾

傳曰不有君子其能國乎予嘗三復斯言未嘗不流

涕太息也如漢汲黯蕭望之李固吳張昭唐魏鄭公  
狄仁傑皆以身徇義招之不來麾之不去正色而立  
于朝則豺狼狐狸自相吞噬故能消禍於未形救危  
於將亡使皆如公孫丞相張禹胡廣雖累千百緩急  
豈可望乎故翰林王公元之以雄文直道獨立當世  
足以追配此六君子者方是時朝廷清明無大姦慝  
然公猶不容於中耿然如秋霜夏日不可狎玩至于  
三黜而死儻不幸而處于衆邪之間安危之際則公

之所為必將驚世絕俗使斗筭穿窬之流心破膽裂  
豈特如此而已乎始予過蘇州虎丘寺見公之畫像  
想其遺風餘烈願為執鞭而不可得其後為徐州而  
公之曾孫份為兗州以公墓碑示予乃追為之贊以  
附其家傳云

維昔聖賢患莫罕知公遇太宗允也其時帝欲用公  
公不少貶三黜窮山一死靡憾咸平以來獨為名臣  
一時之屈萬世之信紛紛鄙夫可拜公像何以占之



有此其顙公能泚之不能已之茫茫九原愛莫起之

管寧贊

宋蘇轍

序曰余自龍川以歸居穎已十有三年杜門幽居無以自適稍稍取舊書閱之將求古人而與之友蓋於三國得一焉曰管幼安蓋幼安少而遭亂渡海居遼東三十七年而歸結於田廬不應朝命年八十有四而沒功業不加於人而余獨何取焉取其明於知時而審於處已云爾蓋東漢之衰士大夫以風節相尚其

立志行義賢於西漢然時方大亂其出而應世鮮有能自全者潁川荀文若以智策輔曹公方其擒呂布斃袁紹皆談笑而辦其才與張子房比然至九錫之議卒不能免其身彭城張子布忠亮剛簡事孫氏兄弟成江東之業然以直不見容力爭公孫淵事君臣之義幾絕平原華子魚以德量重於曹氏父子致位三公然曹公之殺伏后子魚將命至破壁出后而害之汝南許文休以人物臧否聞於世晚入蜀依劉璋

先主將克成都文休逾城出降雖卒以為司徒而蜀人鄙之此四人者皆一時賢人也然直已者終害於身而枉已者終喪其德處亂而能全非幼安而誰與哉舊史言幼安雖老不病著白帽布襦袴布裘宅後數十步有流水夏暑時策杖臨水盥手足行園囿歲時祀其先人絮帽布單衣薦饋跪拜成禮余欲使畫工以意髣髴畫之昔李公麟喜畫有顧陸遺思今公麟死久矣恨莫能成吾意者姑為之贊曰幼安之賢

無以過人余獨何以為賢賢其明於知時審於處已  
以能自全幼安之老歸自海東一畝之宮閑不求通  
白帽布裘舞雩而風四時蒸嘗饋典必躬八十有四  
蟬蛻而終少非魏人何以命之天之逸民

夫子贊

宋 米芾

孔子孔子大哉孔子孔子以前既無孔子孔子以後  
更無孔子孔子孔子大哉孔子

聖檜贊

宋 米芾

煒東皇養白日御元氣昭道一動化機此檜植矯龍  
怪挺雄質二千年敵金石紀治亂如一夕百代下蔭  
圭璧

臧僖伯贊

明方孝孺

戡禍彌亂世貴乎兵兵之所加治其既形心術之微  
禍亂所自孰能治之諫臣之事在昔魯隱矢魚於棠  
其事雖微其志已荒有臣僖伯憂其漸懈昌言正色  
以訓以戒天稔其禍聞善不為鍾巫之難實兆於斯

聖之求諫匪曰觀美君情既宣萬事畢理自以為智  
厭棄人言篡弑將行至死不聞諫之不用鮮不忘國  
我思若人中古遺直

孟獻子贊

明方孝孺

世無材智不過於削非有仁人何以為國魯號多士  
粲乎有文穆穆獻子其德可尊用侈國貧言利愈密  
宣成之間苛政橫出夫子是悼勢莫止之昌言在人  
後世紀之乘馬之微雞豚不畜富有天下恒患不足

古稱盜臣或以為才我懷夫子莫知我哀

子臧贊

明方孝孺

恒人於利錙銖必競亦獨何心力讓千乘仁義可樂  
名節可尊肯取瓦礫棄遺璵璠篡弑紛紛孰非臣子  
先生醜之恐其污已高不忘世潔不亂倫大鎮社稷  
為曹宗臣秦楚有王雄霸中國戰不足稱千載汗辱  
去後取此疇能與偕以利易生彼何人哉

子家羈贊

明方孝孺

魯有盜臣擅國自恣昭公寡謀躁以失位遜齊居晉  
淹恤八年惟子家子奉以周旋自有可為謀猷甚遠  
拒而不從卒以喪返使用其言動合事機豈其終身  
棄國不歸久而彌恭困而無怨義不近名忠不避難  
考德千載難乎其全夫子之節允也可傳晉文五臣  
世嘉其績彼也以才夫子以德

諸葛武侯贊

明

方孝孺

漢治任法難乎大臣惟忠武公千載一人綜覈萬變



以義而動虎躍龍驤天下震恐極其智能亂不足平  
天實厄之大勲無成成敗紛然處之甚暇論其所存  
伊呂流亞古學不傳士氣益卑公心不忘百世之師

張詠贊

明方孝孺

為政匪難患才之卑才優於事乃克有為惟忠定公  
萬夫之傑屢剖郡符有聲烈烈威惠所被梁益其尤  
坐鎮西南分天子憂時其寬嚴陽舒陰慘談笑指麾  
奸強破膽豈惟善政可配古人卓行危言為世名臣

將相無功名隨身逝誰能使民廟祀百世乘鳳騎尾  
公神在天嗟彼儉邪敢執公鞭

七忠贊

明 周應治

鐵鉉 維物堅剛孰有逾鐵公以系姓豈天植耶見  
事風生讞獄電決見器高廟才節昭揭薇垣餉師水  
陸不忒城守東藩既破復飭懸板幾中淮陽逐北中  
原寒心北平失色詎知天授大內自焚豈不戴天心  
戀舊君顧盼難得妻子奚論雖膏鼎鑊忠稱帝閭舊

國有憾故園無家女亦貞義有識共嗟雄才揮霍勁  
節孔嘉磨光日星撐持岱華

陳迪 有歿而光有生而缺蘭蕤芳存玉碎晶裂猗  
與少保骸體不羣起家辟召通籍詞林惠流海岱威  
著南溟文昌八座眷亦殊焉受知國士為殷頑民一  
醮靡改九死不臣身同子磔名共日赫氣壯山河血  
化萋碧兩水明鏡雙橋落虹有祠峩然騰肅高風媿  
彼奸諛覲顏二天晚陵猶生玉潔蘭荃

胡子昭 靖難入繼自其家事非瞻烏何謂就義  
原本皇祖精忠豎幟三十年間雷厲颺淬公性耿介  
希古同流獻賦蜀都較史天球麾招莫動淮南寢謀  
豈有他腸各為分憂大物既改有力負舟株連繩引  
死又何求上酬國恩下謝從遊蜀有專祠各有遺休  
丹心皓月萬古清秋

丁志芳 泉不歸山雨不上天冰霜隨化金石謝堅  
丈夫正氣獨往無前栗烈堅剛有折靡遷公起甲科

委質革朝風高烏府聲著吳橋同時黃練共效賈晁  
刻核太至烽燧是挑北平日張境土日感一木莫支  
嚮師而哭豈不能去鼠竄是惡豈不能臣鷓張其腹  
潛遣妻子獨以身留我頭可截我節自道節俠惠文  
氣結蜃樓仁必有後天不謬悠勇足報主智能全嗣  
埒彼鷓夷託後齊使龐復為丁忠且蒙謚赫赫御史  
智勇具備

高巍 惟辯襄節推孝移忠遼州既孝艾母何豐錄

用先朝建白摩空分王諸王晁策賈衷書請罷兵射  
燕遺風從戎南潰羈旅于東墨守濟南與鐵同功寧  
不如烏胡集于枯臣哉鄰哉艱難是扶豈如弁髦敝  
因改圖詔彼管魏自甘溝塗冰心一賦慷慨丈夫高  
山可仰青簡不污

鄭華 有賊景隆殊寵專征金川失守賣主逢迎彼  
狡童俊鎮江專城一矢未遺首豎降旌行人散地判  
官下陳東平未蒞癯然經生驅車就難天為震驚力

疾戰死力獲瓊瑛螳怒胡益犬吠見貞彼李童子人  
面強行孤忠論定仁廟有評誰曰傷勇振古之英  
王省 秩不必崇祿豈在膺恤緯憂深懷沙心苦秉  
鐸雖微風教是主祿焉避難罷士儔伍齊黃之死難  
端目紐其他族類皆繇掣肘非公生亂何嫌何咎升  
斗君粟抱關君守明倫大呼觸柱碎首烈峻文山清  
徹濟瀏祇成個是遑恤死所汨羅首陽同此遐舉

孟母祠贊

明 鄧原忠

古有胎教實謹厥初生焉而長學可緩與學也者師古訓是式日就月將允有令德懿惟孟母克教厥子始而三遷慎厥攸止賢哉子輿孔孫是師師訓惟謹母言敢違母也惟賢斷機以喻中途輟學曰猶此故斷機難緒輟學曷成緝之熙之底於光明人誰無母克教者稀間或有焉孰喻以機父而教子且有未全矧為母者教何能專有母若孟厥子乃賢有子若孟母德著焉知言養氣亦克允蹈教明性學治闡王道



人心斯正楊墨斯闢三聖是承允矣宏績著書七篇  
垂訓遠而不有賢母曷克若茲峩峩嶧山鍾靈發祥  
曰古邾國苗裔其昌斷機有碑曝書有臺肯構肯堂  
期爾後來我矢厥詞銘于堅石世為母者是倣是則

聖賢贊

有碑在歷城縣學

明 陳鳳梧

伏羲贊 於惟神聖繼天立極仰觀俯察卦爻斯畫  
始造書契以代結繩開物成務萬古文明

神農贊 聖皇繼作與天合德始嘗百草以濟天札

農有耒耜市有交易澤被生民功垂無極

黃帝贊 帝德通變神化宜民垂裳而治上乾下坤  
井野分州迎日推策百庶惟熙萬世作則

帝堯贊 欽明揖遜德協萬邦魏乎成功煥乎文章  
天地之文日月之光允執厥中道冠百王

帝舜贊 重華協帝授受於唐惟精惟一濬哲文明  
兩階干羽九韶鳳凰恭己南面萬世綱常

禹王贊 文命四敷三聖一心有典有則克儉克勤

成功不伐善言則拜九州攸同萬世永賴

湯王贊 勇知天錫聖敬日躋建中於民萬邦惟懷  
顧謏明命肇修人紀垂裕後昆道統斯啟

文王贊 文德之純於穆不已肅肅雝雝緝熙敬止  
後天八卦昭如日星大哉易繫式開太平

武王贊 丕顯文謨丕承武烈偃武修文天下大悅  
丹書之受洪範之咨百王遺緒一代丕基

周公贊 天生元聖道隆德備制禮作樂經天緯地

上承文武下啟孔顏功在萬世位參兩間

孔子贊 道冠古今德配天地刪述六經垂憲萬世

統承義皇源啟洙泗報德報功百王崇祀

顏子贊 天稟純粹一元之春精金美玉和風慶雲

博文約禮超入聖門百王治法萬世歸仁

曾子贊 守約而博學恕以忠聖門之傳獨得其宗

一貫之旨三省之功格致誠正萬世所崇

子思贊 精一之傳誠明之學聖門嫡派斯道有托

發育洋洋爲飛魚躍慎獨之訓示我先覺

孟子贊哲人既萎亞聖斯作距詖闢邪正論諤諤  
堯舜之性仁義之學烈日秋霜泰山喬嶽

山東通志卷三十五之七

欽定四庫全書

山東通志卷三十五之八

藝文志八

頌

漢成陽令唐扶頌

君諱扶字正南潁川郟人也其先出自慶都感赤龍  
生堯王有天下大號為唐洽致雍熹尊天重民禪位  
虞舜光炙茅土通天三統苗胄枝分相土脈君因氏  
唐焉累取含祚受天之祐胤嗣彌光為漢臺輔君父

孝廉郎中早卒季父蜀郡蜀郡從弟會稽會稽從弟  
南陽君從兄東萊太守南陽弟司空公在朝遠隨正  
色竭忠為國討暴六侯俱封受土襲爵金縉十三君  
繼厥緒少有岐嶷耽道好古讀書咏詩綜緯河雒底  
究羣典彘紐上進守舞陽丞弱冠守昆陽尉潁陽令  
隱練州郡所臨有迹帝嘉其德特拜郎中察能洽處  
除豫章鄔陽長夷粵拊摠忤強難化君奮威颺武視  
以好惡蠻貉振疊稽顙怖服闕上前逋千有餘萬盜



賊衰息境界晏然三載有成州郡詳表遷成陽令承  
先聖之弘軌見讚像之高蹤遂興無為之治優賢啟  
厯表善絀惡導九德以綏民宗晏晏之惠康風移俗  
易莫不革心朝有公卓家有參騫分邾之治復隆闕

君追惟堯德廣被之恩依陵亳廟造立授堂四遠  
童冠樞衣受業著錄千人朝益暮習衍衍閭閻尼父  
授魯曷以復加靈祇瑞應木連理生白菟紫鳩游君  
園庭蕩蕩之治莫能名焉三司察功朝廷審真以君

威恩並流文武兼興東萊海濱須君以寧詔書換君  
昌陽令吏民慕戀士女惟艱捺牽君車輪不得行君  
臣流涕道路琅玕迫有詔命靡由復還於是故從事  
仲宇仲授張躬萬龍督郵仲規郡掾閭葵等乃共刊  
石樹頌歌君之美其辭曰赫赫唐君帝堯之苗氏族  
不一各任所安本同末異蓋謂斯焉君體煥炳有芬  
有聲如山如闕  
如不傾如闕  
如海澹如闕  
惟直  
如矢秉銓據衡在朝肅肅閨門雍雍廉踰伯叔潔如

珪璋賦政於外爰及鬼方淮夷來降寇賊遂亡黎庶  
攸寧黔首歡康以德綏撫宣恩六陽以仁恤弱以義  
抑強恩由春夏威如秋霜賞罰分審白黑著明憂老  
閔稚不侮寡矜耽樂道術咀嚙七經五六七訓導  
若神接下施與投財如損吏服其德民歸其恩父父  
子子君君臣臣不師自舉不拘不煩囹圄空虛國無  
佞民德及草蟲澤流無垠蝟飛蠕動咸賴我君顯顯

令稱德音常存

凡碑內殘缺字  
莫攷空白如右

宓子賤頌

唐賈至

清淨致理中庸之德至高明柔克簡易之體大繹微  
旨而徵遺論何先生道蔚其歲蕤者乎先生宣慈在  
躬精義入神德順乎天性根於人殷其如雷曖然如  
春始受業於仲尼終委質於魯君爾乃周道陵遲王  
風衰息吳楚竊於位號干戈亂於原野則我魯國無  
齊晉之強定哀非桓文之主三卿有僭虐之政先生  
處此亂邦從容理邑平心氣而全耳目晏然躋富壽

之域焉自非知微知彰變化無窮孰能臻此觀夫為政之大體元之要卹孤哀喪舉士問弔訓之以悌加之以孝借五更而悟君賢三老而稟教然後燕居以佚其體張樂以和其人夜漁不戒而信欺吏不威而息是以宣尼惜君之理小子期問君之政暇何其遠哉向使移於有國之君則陶唐之理也施於有政之臣則二南之化也昔舜左禹而右臯陶不下席而天下理周公殺膳在御不解懸而四夷伏小大則異其

揆則同天寶初至始以校書郎尉於單父想先生行  
事徵其頌聲而古碑殘缺苔篆磨滅使立志之士何  
以挹其遺風焉嗚呼其道存而其事往其人亡而其  
政息哀哉遂作頌曰嗚琴湯湯宓子之堂清淨無為  
邑人以康澆風化淳霸俗致王誰謂陽鱈革而為魴  
鱠鱠黃髮或師或友芄芄麥苗不稂不莠齊師已郤  
魯俗斯阜諫或剖心伊人引肘穆穆伊人希聖之才  
堯舜既往孰為來哉從時卷舒與道徘徊游泳孔門

取容定哀泱泱千古顯顯令德聲隨悠沒惠與順息  
人亡政敝道播神默寂寥夜川惆悵舊國荒祠尚掃  
苔篆將磷尋風聆韻想見其人年代邈殊精誠閭親  
再表貞石頌聲維新

裴公德政頌

唐  
孫 逖

昔太公之理齊也尊賢知尚有功泱泱大風千載不  
泯石慶古之良相也臨淄社焉于公古之良吏曹也  
東海祠焉裴公今之良太守也濟北頌焉今古一揆

謂之齊志苟非其人為大偽焉君子是以知裴公之為政有異能矣初公以甲子歲秋八月莅於是邦祇通明命弘敷令典教之訓之養之育之俾夫闔境之內靡清風漸膏雨醉純德飽話言若卜筮之是孚如草木之允殖用克畏慕升于大猷其明年也皇帝東巡狩至岱宗自洛及兗於皇時邁雷轂萬乘雲旂千里供帳於東道者凡十有六州焉大或數圻次或萬井中產者輕幣膏梁者倍征方事之殷猶懼不給茲



郡褊小實難圖也公淵然深識卓然遠謀擇利而行  
慮善以動西自於陽臺谷東晉於長清造舟為三橋  
置騎為驛闢野為兩傾除道為九達或總或秸或薪  
或楨或饗或餼或糧或糗爨之踏踏積之粟粟其崇  
如墉其比如櫛皆先之以方畧備之以生聚因吏祿  
之奇贏雜官用之餘羨通變合度豐省中程編戶之  
民秋毫勿與絲是邑無征令鄉無斂法賈不利於乘  
急農不傷於甚賤且狎其野而安其業人所謂勤而

不得施而弗費雖小必濟不亦宜乎抑又聞之居簡則易於德綏處煩則難於柔克大抵皆是其誰不然公始自知供迨于卒業不鞭一卒不貫一吏繩責勿用鷓譙無施禮以生其恭悅以盡其力役不兩令事無後期雖子文治兵之舉叔敖城沂之政類能比德曷足稱多泊金輿反旂旌別淑慝監頓史劉曰政勸農使盧怡竝奏公理行第一議者以為當矣其三年秋大水河堤決諸郡有聞皆俟詔到莫敢興役害因

滋甚時公以為執事諉上者非奉公之法也便文自營者非盡忠之計也亦既成奏因而發卒播告厥指卒籲於人荷鍤者襁屬負圖者麇至從公于邁祁祁如雲公俯臨決河躬自護作雨不張蓋塵不振衣饋不致鮮寢不處館蔬食以同其烹飪野次以同其燥濕版築競勸鼙鼓弗勝克鞏而成匪亟而速以浹旬之役興百倍之利澹災革弊人到於今賴焉古之所謂敏則有功豈虛言矣公之方在河上也有執訊者

傳詔命公為宣州刺史公悼其功之不成且懼人之體怠未即宣布周之密之公撫巡如初訓勵不輟及堤役既畢國人皆賀公於是解印出次啟籥見書莫不瞿然而駭曰不虞公去之速也嗚呼曷歸乎既而幢祭就國干旗守途野有輟耕巷無服馬男女以辨號泣相望或觴於郊或餞於境扶服遮道沮攔駐車莫肯旋歸迨過信宿夫所居人富所去見思前史以為有德君子之遺風倚嗟裴公蓋有之矣公名耀卿

字渙之河東聞喜人祖某皇朝亳州鄆縣令父守貞  
皇朝成寧二州刺史贈晉州史又贈州都督階受社  
必大垂裕不朽彰徹簡冊布昭令聞其緒業有如此  
者公之昆友故冀州刺史子余等六人俱以儒行達  
天下之人謂之六龍公之自出今屯田員外郎韋述  
等七人俱以才名進天下之人謂之七子其族姻有  
如此者公覃訐有聲髻鬣克類公侯表於龜筮詩禮  
成於小學八歲神童擢第則已殊於公路矣丕髦之

後尤邃於文長安中則天首命有司考試調集之士而第其詞高下公以甲科受祕書省正字異其對也睿宗之在藩邸精選僚屬公為典籤兼掌文翰愛其才也其藝文有如此者頃之遷國子主簿試詹事府丞歷河南丞曹參公考功員外郎除右司兵部二郎中自長安令臨此郡自宣城守改冀州公歸為政不移於故迹延壽理人亟登於高第入拜戶部侍郎今為左庶子其閎閱有如此者若乃邁德由已全誠自

衷出入孝弟周旋禮樂幅利以儉葆光以和仁而有  
剛直而不倨微妙析理入於無間清明開物周於有  
象享茲具美可謂大賢其庇身也弘矣其所憑也厚  
矣詩曰敷政優優百祿是遒又曰君子萬年介爾景  
福夫如是欲辭福祿其可得乎方當彌綸帝績豈徒  
潤色吏事而已盧縣父老某等懷公之惠不可彌亡  
私欲銘德頌美計功稱代以予國之史臣也學於春  
秋褒貶之義乃因邑子校書郎衛憑假詞不能徵拙

于我事闕詳實言多遺恨著循吏之傳願守文翁述  
野馬之詩慙非史克詩曰瞻彼濟矣湜湜其止有斐  
君子令聞不已帝省其方和鸞央央務穡常布駿惠  
我王我隰既溢我民既卹成之不日有始有卒黃髮  
番番飲公之和矢詩不多維以遂歌

庾公德政頌

唐李陽冰

荀藐古之良宰也榆次碣之庾公今之賢百里也龔  
丘頌之議者謂庾公之政大矣公初告羣吏曰昔孝



宣憂元元以為經國理政先乎令長乃擇郎官御史  
出宰縣邑我自任城尉驟居五百石非才何以當之  
誓務整蘇疲人祇若明命乃崇禮讓省刑罰紓力役  
闢土地宣慈務寬訓儉示德潤作時雨和為春風於  
是齊魯丕變井閭咸復三載考績一方歸最都督兼  
御史清河張公曰是牧伯之賢也訓俗馭官勸直沮  
枉述職之地數能稱之曰方諸爽氣日暮更清比之  
松筠歲寒轉茂題以上下之目出乎羣英之表百城

千里異聲同歡曰以伯達之良牧賞次孫之茂宰宜  
矣公名賁字文明其先潁川人成周之時世為掌庾  
因以命族公其胄焉公之考曰欽嗣為兗州別駕王  
父曰元主為尋陽令曾王父曰師則為蜀王文學楷  
模繼代龜麟接武大厯中邑老鼓滔等三十五人以  
公政務之大咸願刻石褒美申於元戎元戎允答縣  
人以陽冰與公周旋備詳德行俾之作頌有愧能文  
辭曰於穆庾公宰守之良化洽百里風播一方邑老

上請願言頌德元戎嘉之石金乃刻大曆五年九月  
三日建

慶歷聖德頌

并序

宋石介

三月二十一日大昕皇帝御紫宸殿朝百官相得象  
殊拜竦樞密使夷簡以司徒歸第二十二日制命昌  
朝參知政事弼樞密副使二十六勅除修靖素並克  
諫官四月八日皇帝御紫宸殿朝百官衍樞密使仲  
淹琦樞密副使乃用御史中丞拱宸御史邈御史平

諫官修靖十一疏追竦樞密使勅十三日勅又除襄  
為諫官天地人神昆虫草木無不懼喜皇帝退姦進  
賢發於至聰動於至誠奮於睿斷見於剛克陟黜之  
明賞罰之公也上視漢魏隋唐五代幾千五百年其  
間非無聖神之主盛明之時未有如此選人之精得  
入之多進人之速用人之盡實為希闊殊尤曠絕盛  
事在皇帝之德之功為卓犖瑰偉神明魁太古者一  
雲氣之祥一草木之異一蹄角之怪一羽毛之瑞當

時羣臣猶且濃墨大字金頭鈿軸以稱述頌美時君  
功德以為無前之休配天之績如仲淹弼實為不世  
出之賢求之于古堯則夔龍舜則稷契周則閎散漢  
則蕭曹唐則房魏陛下有之諸臣亦皆天下之人望  
為宰相管官者陛下盡用之此比雲氣草木蹄角羽  
毛之異萬萬不侔豈可翻無歌詩雅頌以播我君之  
休聲烈光神功至德刻於琬琰流于金石告于天地  
奏于宗廟存于萬千年而無窮盡哉臣實恥之臣嘗

愛慕唐大儒韓愈為博士日作元和聖德頌千二百言使憲宗功德赫赫焯焯昭于千古至今觀之如在當日陛下今日功德無讓憲宗臣文學雖不逮韓愈而亦官於太學領博士職歌詩讚頌乃其職業竊擬子愈輒作慶厯聖德頌一首四言凡九百六十字文辭俚鄙固不足以發揚臣子之心亦欲使陛下功德焯焯昭于千古萬千年後觀之如在今日也臣不勝死罪臣賤無路以進姑藏諸家以待樂府之採焉

於維慶曆三年三月皇帝龍興徐出闈闈晨坐太極  
書開閭闔躬攬賢英手鋤姦梟大聲溼溼震搖六合  
如乾之動如雷之發昆虫躑躅妖怪藏滅同明道初  
天地嘉吉初聞皇帝感然言曰予父子祖付予大業  
予恐失墜實賴輔弼汝得象殊重慎微密君相予久  
予嘉君績君仍相予笙鏞斯協昌朝儒者學問該洽  
與予論政傳以經術汝貳二相庶績咸秩惟汝仲淹  
汝誠予察太后垂簾湯沸火熱汝時小臣危言葉葉

為予司諫正予門闢為子京兆聖子讒說賊叛于夏  
汝往式遏六月酷日大冬積雪汝暑汝寒同於士卒  
予聞辛酸汝不告予晚得弼子心弼悅弼每見子  
無有私謁以道輔予弼言深切予不堯舜予自笞罰  
諫官一年奏疏滿篋侍從週歲忠力盡竭契丹亡義  
檣杙饕餮敢侮大國其辭慢悖弼將予命不威而懼  
卒復舊好民得食褐沙磧萬里死生一節視弼之膚  
霜剝風裂觀弼之心鍊金鍛鐵寵名大官以酬勞渴



弼辭不受其志莫奪惟仲淹弼一夔一契天實賚予  
予其敢忽並來弼予民無瘥札曰行汝來汝予黃髮  
事予二紀毛禿齒豁心如一分率履弗越遂長樞府  
兵政無蹶予早識琦琦有奇骨其器魁樞豈視居楔  
其人渾樸不施剗剗可屬大事敦厚如勃琦汝副行  
知人予哲惟修惟靖立朝轍轍言論礫砢忠誠特達  
祿微身賤其志不怯嘗詆大臣亟遭貶黜萬里歸來  
剛氣不折屢進直言以補予闕素相之後含忠履潔

昔為御史幾叩予榻至今諫疏在予箱匣襄雖小臣  
名聞予徹亦嘗獻言箴予之失剛守粹慤與修儔匹  
並為諫官正色在列予過汝言無鉗汝舌皇帝明聖  
忠邪辨別舉擢俊良掃除妖魅衆賢之進如茅斯拔  
大奸之去如距斯脫上倚輔弼司予調燮下賴諫諍  
維予紀法左右正人無有邪孽予望太平日不逾浹  
皇帝嗣位二十二年神武不殺其默如淵聖人不測  
其動以天賞罰在予不失其權恭己南面退姦進賢

知賢不易非明不得去邪惟難惟斷乃克明則不貳  
斷則不惑既明且斷惟皇之德羣下踧踖重足屏息  
交相告語曰惟正直毋作側僻皇帝汝亟諸侯危慄  
墮玉失烏交相告語皇帝神明四時朝覲謹修臣職  
四夷走馬墜鎧遺策交相告語皇帝神武解兵修貢  
永為屬國皇帝一舉羣臣懾焉諸侯畏焉四夷服焉  
臣願陛下壽萬千年

附對

郊祀對

漢董仲舒

廷尉臣湯昧死言臣湯承制以郊祀事問故膠西相仲舒臣仲舒對曰所聞者古天子之禮莫重于郊郊常以正月上辛日者所以先百神而寢居前禮三年喪不祭其先而不敢廢郊郊重于宗廟天尊于人也王制曰祭天地之牛角繭栗宗廟之牛角握賓客之牛角尺此言德滋美而牲滋微也春秋曰魯祭周公用白牡色白貴純也帝牲在滌三月牲貴肥潔而不

貪其大也凡養牲之道務在肥潔而已駒犢未能芻  
秣之食莫如今食其母便臣湯謹問仲舒魯祀周公  
用白牡非禮也臣仲舒對曰禮也臣湯問周天子用  
騂剛羣公不毛周公諸公也何以得用純牲臣仲舒  
對曰武王崩成王幼而在襁褓之中周公繼文武之  
業成二聖之功德漸天地澤被四海故成王賢而貴  
之詩曰無德不報故成王使祭周公以白牡上不得  
與天子同色下有異于諸侯臣仲舒愚以為報德之

禮臣湯問仲舒天子祭天諸侯祭土魯何緣以祭郊  
臣仲舒對曰周公傳成王成王遂及聖功莫大于此  
周公聖人也有祭於天道成王令魯郊也臣湯問仲  
舒魯祭周公用白牡其郊何用臣仲舒對曰魯郊用  
純騂剛周色尚赤魯以天子命郊故以騂臣湯問仲  
舒祠宗廟或以鶩當鳧鶩非鳧可用否臣仲舒對曰  
鶩非鳧鳧非鶩也臣聞孔子入太廟每事問慎之至  
也陛下祭躬親齋戒沐浴以承宗廟甚敬謹奈何以

鳧當鶩鶩當鳧名實不相應以承太廟不亦不稱乎  
臣仲舒愚以為不可臣犬馬齒衰賜骸骨伏陋巷陛  
下乃奉使九卿問臣以朝廷之事臣愚陋曾不足以  
承明詔奉大對臣仲舒冒死以聞

化民有道對


漢東方朔

堯舜禹湯文武成康上古而帝經歷數千載尚難言  
之臣不敢陳願近述孝文皇帝之時當世耆老皆聞  
見之貴為天子富有四海身衣弋綈足履草屨以韋

帶劍莞蒲為席兵木無刃衣緼無文集上書囊以為  
殿幃以道德為麗以仁義為準於是天下望風成俗  
昭然化之今陛下以城中為小圖起建章左鳳闕右  
神明號稱千門萬戶木土衣綺繡狗馬被績罽宮人  
簪璫瑁垂珠璣設戲車教馳逐飾文采叢珍怪撞萬  
石之鐘擊雷霆之鼓作俳優舞鄭女上為淫侈如此  
而欲使民獨不奢侈失農事之難者也陛下誠能用  
臣朔之計推甲乙之帳燔之於四通之衢卻走馬示



不復用則堯舜之隆宜可與比治矣易曰正其本萬  
事理失之毫釐差以千里願陛下留意察之



山東通志卷三十五之八